

Istregè jaunīstie

Šendēina īpatinga dēina: atvažiou krautovininks i kaima. Egliekaimie nier bažnīčes, nabier bibliotekas, vakū darželē. Kaima centrēnie aikštie žuolē vēs dar naužzielē bovosēs valgīklas pamatū, tomsēs longās – depresējes pažīmietuom akimis, i kelalē veiz uždārīta krautovālē. Bēškēloka tuoliau ruogsa kažē kuokē repieža – dabā nabatpažinsi – a lēntpjūvē, a malūns bovēs. Numērē koltūras nomā lika naišdraskītē, bet sunkē virst i bendruomenēs cēntra: vasara žmuonims darbū natrūkst, rudēnē – žeima nieks nanuor ēš šēltuos truobuos neštē skaudontiū sanariū. Dvējū plītēniu suocialiniu būstu avēlie suocialinē gīven sāva gīvenēma kāp kuokē apētama salēlē. Nu anū daugiausē kēnt aikštēs soulalē: suocialinē ēšklēben, ēšraun, i pečiu sukrioš. Kaima žmuonele apēnt pastāta. Tēp ē kariau. Tik nier aiškoma, katrei nusēlēs.

On tū souloku sosied žmuonelē, atvažiauļēntē krautovēninka lauktē. Krautovēs mašina atvažiou tris sīkius par nedielē. Žmuonelē na vein krautovēnius dalīkus ded ont stāla. Tris sīkius ētē apsēpērkētē tikrā nier gīva reikala. Ale kāp nesē, kor geriau naujīnas sožēnuosē, je na ont soulalē susiedēs su kētās egliekaimēškēs. Kaimē daugiausē sotēksē gaspaduorius ē gaspadēnēs priš pēnkerius a vēsa dešimtē metu septīniū dešimčiū mētu jubiliejus atšvēntosius. Gaspadēnautē rēk – sentē nier kumet. Ka jaunūmenē priš akis nasēmaiša – metā biegs, dūšē leikt tuokē pat.

Šendēina krautovēs dēina. Egliekaimēškē nusēmes muolēnus drabužius, ēš kompa kam rēk ēšsētrauks gražesnēs lazdekēs ē keloko par kalnalē žengs link aikštēs krautovēninka lauktē. Bagduonu Juonis pērks droskas pakioka, drūktāsīs Petros trejeta bambaliu lēmonāda, Muonika – anūkou čokolāda plītēlē. Savaitgalie atvažīavēs, vāks tor pas babunēlē skanomīna rastē. Ēš miesta parsēkrausciosē Belgienē (Belgijuos namačiosi nie sapnē), suodēnontē cebolēs šaknēmēs ē vēršo, pērks dešruos sāva bjaurem kodliou, katras gaurus truobuos krāta. Kaimelie tuo nier bovē. Puonē Valē vēsumet perk kuokē nuors niekioka. Ana vēs stengas maišīteis agranuomou Vītautou po akiū – nu kaima žmuoniu napasēkavuosē. Našlie Angielē par Juonēnes a tēp tuokēs vakarās, ka žiuogū čirpēms šērdē draska, pasēklīsdava so agranuomo dar anuo Suopijē gīvā esont – ilga Vītautienelē viežīs griaužē. Muotrēška vēlčiū toriejē pačiū gražiausio, bet kapinies pasēmaišē Valē. Anuos vīra kapielis bova šalēp Suopējēs kapa. Vēs šuoksās Suopēkēs kapa tvarkītē ē prisējaukēna Vītauta cielēms trejims metams. Vo paskon pasēmaišē ta miestiuonka pagal laikraštē skelbēma. Valē nomūs apsēžīgiavosē pasēstrajīs ē vēs stengies Vītautou po akiū užkliūtē. Ana tikiejuos, ka dar draugēli širdie kuokē nuors užsēlēkosē

kébèrkštékè plīkst ir viel uždegs bovose lèipsna. Viel galies susèētè, lèipžèidžiu arbāta gerdamè, sīkio televizuorio veizietè. Angielè piktā èš anuos čīdèjuos. Bet Valè – leižovingā atšaudava tēp, ka laikīkès:

– Kuo to čīa dabā spèrgè. Aš da kuojès è soglaudo è praskèito – vo to vès i lazda èsèkèbosè, – užmesdava sāva neprietelkā.

Šèndeina Valè nieka napèrka. Tik pasèterāva, a kas navažiou i miestelè. Autuobusos pro Egliekaimè praliekdava veina sīki nedieliuo, nedieliuos dèina.

– Natoro kāp nuvažiautè sosètèktè žmuogo, so katrou sosèpažènou internetè, – paaiškèna.

– Nuvešo tavè, Valītelè, – lieta pratarè Vītauts. – Ale bet èš tū pažinčiū pagal skelbèma, interneta – nieka gèra.

Anodo nuejè link Vītauta suoduos prè mašènas, palèkè kaimelè žmuonès spieluotè – so kou grīš Valè, so kou švès sava artiejontè septīndešimtmetè.